



24. Oktober 2024

UKA2024/85

**Niuertarfinni iluanaaruteqartarneq pillugu inatsisissatut siunnersuummik Naalakkersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut.**  
(Inatsisartunut ilaasortaq Doris Jakobsen Jensen, Siumut)

Siumut sinnerlugu siunnersuuteqartoq Doris J. Jensen qutsavigaarput.

Sumiluunniit isumaqarpugut niuerfiusuni niuertarfinnilu pingaaruteqartoq akilersinnaasumik ingerlataqarnissaq, aningaasaqarnikkullu pitsaasumik kaaviaartitsilluarneq pissappat iluanaaruteqarfiusumik ingerlatsineq niuerfinni tamani pingaaruteqartoq. Taamaakkaluartoq nalimmassaaneq nalimmassaasarnissarlu pingaaruteqarpoq.

Ingasattajaaraluni iluanaarniarneq, pingaartumik pisortat suliffeqarfiutaanni siunertaangilaq, aamma sumiiffiit naammattumik unamminermik ingerlatsiffiunngitsut tamatumani ilanngullugit pisariaqassappat illersorneqarsinnaanissaat pingaaruteqarpoq.

Siunnersuuteqartup soorlu oqaatigigaa, Nunatta avinngarusimanera, nioqqutissat amerlanerpaartaasa Danmarkimit tikisinneqartarnerat, nunarsuarmi akit allanngorarnerat aammalu iluanaaruteqarnissamut inatsiseqannginnerput tunngavigalugu nunatsinni akit nassuiaruminaatsinneqartartumik qaffasissorujussuusinnaasarput, minnerunngitsumik isorliunerusuni, sikusartumi, nunaqarfinni illoqarfinnilu Pilersuisoqarfiusuni.

Uani siunnersuummi – niuertarfinni iluanaaruteqartarneq pillugu inatsisiliornissaq - eqqartortillugu niuertarfinni nioqqutissat akii kisimik pineqarput. Tassa ulluinnarni inuuniarnikkut atorfissaqartinneqartut akiisa erseqqinnerusumik nakkutigineqarsinnaanngornissaat.

Nioqqutissat Nuummi akiinut sanilliullugit nunaqarfinni isorliunerusunilu akit qaffasinnerulersimanerat maluginiagassaavoq, nammaqatigiinneq atorunnaarsinneqarsimavoq. Nammaqatigiinneq qanoq iliorutta eqqunneqarsinnaava? Apeqqut nalilersorluarneqartariaqartoq. Aamma apeqqut alla akit politikikkut aqunneqarsinnaanerat/aqunniarneqarsinnaanerat pitsaasuunersoq nalilersugassaavoq, taannalu oqimaalutarluagassaasoq Siumut isumaqarpoq.

Assartuussinikkut avataaniillu akigitinneqartut akinut toqqammaviliisarmata, qulaaniit akinut aalajangersaanissaq mianersuussassaavoq, aamma siunnersuuteqartup pisai tassaapput ingasaassilluni akilersuisitsineq, naammattumik unammiffiunngitsut tassani pingaarnertut pineqarlutik.

Suliffeqarfiit inuiaqatigiit pigisaasa akigititaat immikkut apeqquserneqartarput akinillu appaanerillu ajornerarlugit. Taakku inuiaqatigiit pigisaasa suliffeqarfiit aningaasartuutaat suuppat? Aningaasartuutit tamarmik matussuserneqartussaapput tamakkulu politikikkut toqqaanaq sunniuteqarfigisinnaanngilagut – soorunami. Uani ersarissarniagarput unaavoq akilersinnaasumik ingerlatineq qanoq akinut sunniuteqartarnerseq.



Akit aningaasartuutigisanut naleqquttut sinneqartooruteqarfiusullu pilersinneqassappata assartuussinermut akinut nalimmassaasoqarsinnaanera periarfissaavortaaq, avataaniillu pisiniarnermi naleqquttunik kiisalu niuertut pikkorissut pisariaqartippagut, pingaartumik pisortat suliffeqarfiutitsinni, soorlu Pilersuisukkunni.

Oqaatiginngitsoorsinnaanngilarattaaq Atuisoqarnermut Unammilleqatigiinnermullu aqutsisoqarfik pilersinneqarmalli, atuisartut siunnersuisoqatigiiffiat nukittoq, aamma peqqinnartumik nerisaqarnissaq pillugu suliaqarsinnaasoq, annerusumik atuukkunnaarsimmamata. Minnerpaamik suliamut ilisimasaqarluartunik iliuuseqallaqqissunillu sulisoqartariaqarpoq, taakkulu suliaasaat sukumiisumik allattorneqarsimasariaqarput. Assersuutigalugu ukiumoortumik nalunaarusiortarnissaat, akinik misissuisarnissaat, sanilliussisarnissaat il.il.

Siumumiit piunasaqarpugut innersuussutigalugu ersarissumik imaatumik siunnersuuteqartup ujjartugaa aallaavigalugu oqaasertaliisoqassasoq:

*Inatsisip siunertaraa ulluinnarni pisariaqartinneqartut niuerutigineqarnerini akigitinneqartunut nassuiarneqarsinnaanngitsumik qaffasippallaarujussuurtunut nakkutilliinikkut atuisup illersorneqarnissaa, tamannalu niuertarfinnut kalunneqatigiittunut, brugsinitut ittunut aamma allanut peqatigiilluni niuertarfittut ilusilinnut, ulluinnarni atortussanik niuertarfinnut, atuutsinneqassasoq.*

Doris J. Jensen pingaarutilimmik qaqitsivutit, inuiaqatigiinni annertuumik iluaqutsiiniarnitsinnut aqqudit suut atussallugit siunnerfiliinissamik tikkuussaqaarninnut, tamannalu pillugu Siumumiit qutsavigiumavatsigit. Isorliunerusuni illoqarfinnilu unammilleqatigiiffiunngitsuni inuussutissat akii naleqqussaavagineqarnissaannut ujartuinerit pitsaasumik alloriartoqarnissaanut Naalakkersuisunit tigulluarneqarpoq. Naalakkersuisut naaperiaanerat pitsaasutut nalilerlugu Nalunaarusiornissamik nassuiaasiortoqarnissaat Siumumiit ilalerparput.

Qulaani taakkartukkagut qulaajarluarneqassasut Siumumiit kissaatigaagut, Naalakkersuisullu naaperiaanerat tigulluarlugu oqallittoqarluarnissaanik kissaassivugut.

Siumumiit taamak oqaaseqarluta Inuussutissarsiornermut Aatsitassanullu Ataatsimiititaliamut ingerlateqqipparput, eqqartorluarneqarnissaalu kissaatigalugu.

Lars Poulsen  
Siumut